

Marere Kori'uaina

PETERO

Ererena Hauna

Puka Aona Irerena 'Abina

Marere neiana hanona a'ikakauma haukia bo'ona atetua rarikia titabu ahi haukia kebarainakia ekia a'ikakauma keba taburanakia. A'ikakauma haukia nehina benakia ia hanona Iesu Keriso pouna namona kateraona 'inina. Weiana Iesu hanona e'ari haeamona emikiri mue, mai ena 'abi'uai ia kemue kemai. Ena 'abi'uai kateraona taburanakia mai bakirokia katebai'lima keaomo kemai. Weiana a'ikakauma haukia ikoikiai ekia a'ikakauma kehobonakia. Ua buonai ia hanona ekia a'ikakaumai katekoru 'ini keaomo Keriso kemue kemai. Ba rani weianai ia hanona 'arakia katea'i.

Puka Paipana Apa'uakia

- a. Roba iahu. (1.1-2)
 - b. Tirama ena bamauri teba'iobi. (1.3-12)
 - c. Mauri robena. (1.13–2.10)
 - d. A'ikakauma haukia ekia hoahoa hau haiara aokiai. (2.11–4.19)
 - e. 'Uai haukia ekia aka. (5.1-11)
 - f. 'Abi orekia. (5.12-14)
-

Banamo 'Abina.

1 ¹Au Petero Iesu Keriso ena iuhubeau hau'u, Tirama etina'animi haumi torama otaraina hano haeai ai tomiaho haumi, Ponto ai, Galatia ai, Kapadokia ai, Asia ai mai Bitunia ai tomiaho haumi narerebenimi. ²Tirama aika hamaka ena 'iobi 'uai ihobonai etina'animi ba Auba Robe hanona wai aba eba robenimi, weiana Iesu Keriso aiana katoka'aina ia aruarunai emi ki'a keutunakia. Nabahuba'ari Tirama ena aoko'o hoana mai baibua hanona heremai keapa'ua.

Tirama Kahabanamona Buabenai Tohana Ebenaka.

³Eka Obiapaka Iesu Keriso Hamana Tiramana kahabanamona, ia ena aoko'o eapa'ua paunai Iesu Keriso e'ari ena mikiri mue maurina aonai aika ebarama muenaka, ba buabenai tohana ebenaka. ⁴Aika nahabuabena itau Tirama nahuna kebenakia. Banamo weiana hanona aba eba'oruna kupai ua'a wai 'eumi, a'i keki'a, a'i ke'opu, abomo a'i ke'akauma. ⁵Tirama ena hiabu nihore ni'aeanimi emi a'ikakauma paunai keaomo bamauri weiana aba eba'oruna kebawaira tinana rani orenai hauna katoa'ina.

⁶Neiana buonai aomi kenamo katoonamo ki'a baha, iamo bariu rani papana aomi tiaro'ari pokina baihobo haeai haeai tihibonimi paunai.

⁷Baihobo weiana hanona emi a'ikakauma ena namo kebatohana.

'A a'ikakauma ena namo hanona gold weiana irubai tebanamona iamo aba ke'akauma hauna ena namo etara haona. Emi a'ikakauma weiana tebahobona tebanamona hauna hanona Iesu Keriso kewaira tina berauranai ibanamomi, ia'i taeami mai imarikiaimi tabanai keao. ⁸Iesu a'i toihā 'apuana iamo turaona'au aina. Bariu a'i toihā ia tua'ikakaumana ba tuaonamo aina, aonamo apa'uana mai namona weiana hanona 'abiai ihina haraina a'i ketaina. ⁹Pokina emi a'ikakauma buabuana tua'ina, weiana hanona aubami ibamaurikia tabana.

¹⁰Mahabanai haukia weiakia Tirama ena aoko'o hoana wai heremai kekara'au hauna temahabanai haukia tehore bamauri weiana tetabu haraina abomo temarereai haraina. ¹¹Auba Robe Keriso euhuna hauna hanona mahabanai haukia aokiae emiaho, Keriso ena haiara mai ena nuabi weiana haiara murinai kemai hauna eba'iobinakia ihobonai ia hanona tebahobona kate'iobina rani tabanai abomo hoana aea homana. ¹²Tirama mahabanai haukia herekiae ebawaira tinana ekia aka hanona kipokia ekia namo paunai aha'i ia wai emi namo paunai, abomo bariu pou namona neiana hanona teiroro aina haukia tehore Auba Robe kupai euhu ririna emai hauna ena baraibarai ai teba'iobinimi. Taba neiakia hanona aneru abomo tenuatae kateiha tinanakia.

Mauri Robenai Kahamiahō.

¹³Ua buonai aomi katoa'ia'i haraina, katoba'oru emi buabenai maikoina hanona Iesu Keriso kewaira tina raninai aoko'o hoana kekara'au 'eumiai.

¹⁴Bariu aiao'o miormiai katoao, hauanimi ekia nuatae babaikia ki'a obokia 'uainai a'i to'obi raninai tobabainakia haukia a'i katobabainakia.

¹⁵'A eaparinimi Tiramana erobe 'abana wai abomimo katorobe emi hoahoia ikoikiae aokiae. ¹⁶Puka robenai aba tererena,

"Wai hanona katorobe

pokina au hanona narobe."

Lev 11.44, 45

¹⁷Wai tu'arara Hamaka, ia hanona maearima nibabakainakia raninai ihaihana enamo hauna a'i niraonana ia ha ha ena aka paukiae

kebabakainakia. Ua buonai emi miao neia hanopakai hanona mai ta'umi katomiaho ihobona hano haeai haumi 'abana. ¹⁸ Wai aba to'ibina, Tirama wai emi mauri ki'a obona weiana 'aba'abami tebenimi hauna aonai ebamaurinimi hanona hanopaka tabakia weiaukia aba kate'akauma haukia silba 'ao gold 'abakiai a'i ekawanimi, ¹⁹ ia Keriso aruaruna namona 'akina mamoe nahuna weiana haunai mani'a 'ao ki'a ha aha'i mamoe 'abanai ekawanimi. ²⁰ Tirama hanona aba wa'i baha hanopaka a'i erama baha aonai ia etina'ana, ba rani orena neianai ewaira tina wai paumiai. ²¹ Wai Keriso paunai Tirama tua'ikakaumana, ia hanona Keriso 'ariai ebamikiri muena haeamona nuabi ebena. Ua buonai wai emi a'ikakauma mai emi buabenai hanona Tirama aonai nemiaho.

²² Bariu Tirama ena 'abi tohana ia'itaeanai aubami aba toutu harainakia, uaho'abami kato raona'auai tohanakia mai taeearana buonai, 'abami katoraona'au ainakia mai aomi ikoinai. ²³ Wai torama mue hanona uho weiana kepari haunai aha'i, iamo weiana a'i kepari hauna Tirama ena 'abi nimauri mai nemiaho banaibananai haunai torama mue. ²⁴ Pokina Puka robenai tererena 'abana,

“Maearima ikoikiae
hanona tubu 'abana,
abomo ekia nuabi hanona
tubu taitaina 'abana.
Tubu ni'ororo taitaina
ni'eho niobo.

²⁵ 'A Obiapaka ena 'abi hanona
kemiaho keaomo banaibananai.”

Isa 40.6-8

'Abi neiana hanona pou namona weiana teiroro aina heremiai.

2 ¹ Ua buonai wai kipomi ki'a akakia ikoikiae, bai'oi, ahu 'oi'oi, wamuru, 'uahi'uahi ikoikiae katone'e 'akaumanakia. ² Miori 'oru'oruna niramahi 'ae nenuatae 'abana, rani ikoinai auba ena bamarere namona katonuatae aina, weianai katoapa'ua keaomo bamauri katoa'ina. ³ Pokina wai hanona Obiapaka ena banamo aba tonobai 'apuana.

Obiapaka Hanona Pihara Maurina, Wai Hanona Tirama Ena Maearima.

⁴ Katomai Obiapaka Iesu herena, ia hanona pihara maurina, hanopaka maearimakia tebaoaoaina 'a Tirama ehore pihara weiana etina'ana, ba eihana hanona enamo ki'a baha ia herenai. ⁵ Wai abomo pihara maurikia 'abana, Auba Robe ena hiabuai Tirama ena marea robenai katoao, wai hanona ia ena robe haumi emi mauri katobena baibenai tabanai keao Tirama kehore mai aonamona kea'i taeanimi Iesu Keriso paunai.

⁶ Puka Robenai na erere aihona,
“Katoihana au pihara ha a'itaeanai
weiana hanona 'uni'uni piharana”

^a 2.6 'ao itu ibakori'au piharana

namona 'akina
 Siona oeonai nahorotina,
 taba ikoikiai ia ahana
 katebakori 'aunakia,
 ia kea'ikakaumana hauna hanona
 a'i kehaumaea."

Isa 28.16

⁷Ua buonai tua'ikakaumana haumi heremai hanona enamo ki'a baha,
 'a ia a'i tia'ikakaumana haukia herekiai hanona pihara 'abaeana aba
 tererena 'abana,

"Itu ibakorina haukia tebaki'ana
 piharana hanona aba itu
 'uni'unina piharanai eao."

Sal 118.22

⁸Abomo,

"Maearima pihara weianai
 tikai tiehe herea
 haeamona tiehe ta'erai ti'eho."

Isa 8.14

Tirama ena 'abi a'i teona a'i teka'aina paunai ia ti'eho, weiana hanona ia
 itaukia Tirama ena raona ihobonai.

⁹A wai hanona Tirama etina'animi maearimami, obia 'arana ena robe
 haumi, robe itubuna, maearima weiakia Tirama 'euna haumi. Tirama ea'i
 taeanimi hanona ena hoahoa namokia katohina pounakia paunai, weiana
 ia hanona wai wapura aonai eapari ahinimi ena ea namona 'akina aonai
 ebakatotonimi. ¹⁰'Uainai wai hanona Tirama ena maearima aha'i 'a bariu
 hanona wai aba Tirama ena maearima, 'uainai wai hanona Tirama a'i
 eaoko'o ainimi 'a bariu hanona Tirama ena aoko'o aba toa'ina.

Tirama Ena Ta'ara'i Hauka.

¹¹E'u raona'au haumi e, wai hanona hano haea mai kaoao 'abaea
 haumi hanopaka neiana aonai, nabahi ahinimi, hauanimi ekia hoahoa
 opukia a'i katobabai, weiakia tihore aubami tehuarina. ¹²A'i tia'ikakauma
 haukia baiatakiai emi hoahoa katobaberona, tia'i ki'animi aka ki'a
 haumiai tibaonimi haukia emi hoahoa namokia kateiha, weiana Tirama
 atana katebanamona ia ena mai raninai.

¹³Maearima ekia hiabu haukia ikoikiai aiakia katoka'ainakia,
 weiana hanona Obiapaka imarikiaina paunai, hanopaka obia 'arana
 aiana katona ia hanona poki hauna, ¹⁴abomo kabamani haukia aiakia
 katona, ia hanona poki hauna euhunakia tiaka ki'a haukia kateba
 haiaranakia, 'a babai harai haukia kateba namonakia. ¹⁵Pokina Tirama
 ena nuatae hanona emi babai haraiai bapo'o po'o haukia ekia aotipa
 'abikia kekaibunakia. ¹⁶Rauhubu herenai to'abaea haumiai katomiaho,
 'a emi miaho 'abaea weiana aka ki'a ikaikauna tabanai a'i keao, wai
 hanona Tirama ta'arana ia'inai katoao. ¹⁷Maearima ikoikiai katomariki

ainakia, 'abami kato raona'au ainakia, Tirama katota'u aina, obia arana katomariki aina.

Keriso Ehaiara Ihobonai Kahahaiara.

¹⁸Ta'ara'i haumi e, emi poki haukia aiakia katoka'aina mai ta'umi, namo 'ao 'abi bero haukia herekiae mo aha'i ia aibara haukia herekiae abomo. ¹⁹Ena ki'a aha'i ia Tirama niraonana paunai hauhaiara nihoaaina hauna weiana hanona Tirama ia kebanamona. ²⁰Katoaka ki'a kateahunimi aonai katobapahihi ena namo hanona taba? 'A aka namokia katobabai katohaiara aonai katobapahihi weiana hanona mai banamona Tirama wairanai.

²¹Neiana paunai Tirama wai eaparinimi. Keriso hanona ehau haiara wai paumiai, ehabonimi ibabataiai eao wai murinai katoao 'apunai katoka'a.

²²"Keriso hanona ki'a ha
a'i ebabaina abomo pinanai
bai'oi 'abina ha a'i
tetabu ahina."

Isa 53.9

²³Tehinabe ki'ana ia aiakia a'i ebamuena, haiara eonobaina ia a'i ebaro 'arinakia, 'a ikoinai hanona beroai nibakai Tiramana imanai eutanakia. ²⁴Keriso huaninai eka ki'a echoinakia matiu ibiri ropo ubinai e'ari hanona ki'a 'eunai kaha'ari 'a bero 'eunai kahamauri. Ena imoa mani'akiai wai aba ebanamonimi.

²⁵'Uainai wai hanona e'akauma mamoena 'abana, ia bariu hanona aba tomue tomai aubami i'imakia mai iha'inikia hauna herena.

Hawainibe Haukia Mai Babi'ekia Ekia 'Abi.

3 ¹Babi'e e, ihobona ta'ara'i haukia ekia poki haukia aiakia tika'aina 'abana, atawami aiakia katoka'ainakia, weiakia Obiapaka ena 'abi a'i tia'i taeania haukia hanona 'abiai aha'i iamo wai emi babai haraiai katobaraona kabenakia, ²emi babai berokia mai mariki akakia kateiha paukiai. ³Wai emi taitai hanona huanimai kapena ibataitaina paunai aha'i, buimi taitaikia 'ao haiami 'abakia gold 'ao taba 'imarekia 'ao emi ibatoto 'arakia rarikia 'abakia aha'i. ⁴'A aomi tohakia haukia, raona namona 'aiaununa ena namo a'i ke'akauma haunai katoba taitainakia hanona Tirama wairanai ena namo eapa'ua. ⁵Pokina 'uaina raninai robe babi'ekia weiakia ekia buabeni Tirama herenai haukia ua tetaitai aiho, atawakia aiakia teka'ai harainakia. ⁶Sara atawana Aberahamo aiana eona mai eaparina ena obia. Wai abomo bero akana katobabaina mai rani ikoinai a'i katota'u hanona nahuna babi'emai katoao.

⁷Hau e, taeara ihobonai wai abomimo atawami kipokia katomiaho haeamo mai 'obi haraimi ia hanona hauani akakiai te'abe'abe katomariki

ainakia, pokina Tirama ena mauri tohana beruberuna kipokia katoa'i haeamona, ua homanai emi bahuba'ari taearana a'i mekaibau marikina.

Aka Bero Paunai Kahahaiara.

⁸'Abi orena neiana, ikoimiai aomi kehamomo, kipokia katoraonaraona, katoraona'au ainimi uaho'aba 'abakia, katoaoko'o ainimi, abomo kato 'aiaunu. ⁹Ekia aka ki'a a'i katoba muena herekiae a'i katoaka ki'a, 'ao ekia 'abi ki'a 'arakia a'i katohore herekiae a'i kato'abi ki'a, 'a tia'i ki'animi haukia hanona katoba namonakia, pokina weiana paunai eaparinimi Tirama ena banamo katoa'ina.

¹⁰Pokina Puka robenai aba tererena,
“Hau ha kenuatae mauri namona
mai rani namona keihana hanona
maeana ke'ima haraina pinanai
ki'a 'abina a'i kehinana,
pinana paruanai bai'oi 'abina
a'i kehina 'apuana.

¹¹Ki'a kehabonakia aka
namokia kebabainakia,
baibua ketabuna murinai ke'au.

¹²Pokina Obiapaka mahana hanona
aka bero haukia neihanakia,
haiana hanona ekia noinoi
nibahubahu ainakia,
'a Obiapaka wairana hanona
aka ki'a haukia niwairanakia
ni'oatanakia.”

Sal 34.12-16

¹³Wai aka namona tonuaki'aina katobabaina hanona tai kehore wai keba haiaranimi? ¹⁴Ia aka berokia katobabainakia mo katohau haiara raninai wai hanona katonamo Tirama wairanai. “Ekia bai'oata 'abikia a'i katota'u ainakia aomi a'i kearo'ari.” ¹⁵'A Keriso hanona aomiai katomariki aina emi Obiapaka robena. Ba rani ikoinai katoba'oru, emi buabeni weiana aomiai nemiaho hauna anina katebakai bakai aina maearimakia ekia bakaibakai 'abina katobamuena mai baibuami abomo mai marikimi. ¹⁶Rani ikoinai emi mauri aonai aomi kebero Tirama wairanai. Weiana maearima weiakia emi aka namokia Keriso aonai tubabai haukia tehinabe ki'animi haukia aka weiakia katehore kateba haumaeananakia. ¹⁷Pokina Tirama ena nuatae raninai aka namonai katohau haiara hanona enamo, emi aka ki'a paunai katohau haiara hanona a'i enamo.

¹⁸Pokina Keriso rani hamonai e'ari ki'a ia'iobokia akakia ikoinai paunai, ia beho aha'i hauna ehore beho haukia 'ekakiae e'ari pokina

keaoainaka Tirama herena. Huanina teahu 'arina, ia aubai emauri mue.
19 Keriso hanona aubai eao tekaibunakia aubakia herekia eiroronakia.
20 Auba weiakia hanona 'uaina 'akinai Noa aunohi ebabaina raninai,
maearima weiakia Tirama aiana a'i teka'aina ia aona eba pahihina
ebai'ima kateraona kabe haukia. Ia aunohi weiana aonai hanona
a'i tebo'o, haukia 'ababani mo bei weiana aonai ebamaurinakia.
21 Ibabataina bei hanona 'uere robe weiana Iesu Keriso ena mikiri mue
paunai wai nibamaurinimi hoana, huanimi 'opuna katoutuna paunai
aha'i ia kato'abi'uai^b aomi mai mahamahakia Tirama wairanai. **22** Keriso
hanona aba kupai ekara'au, bariu Tirama itipana tainai marikiaina
'ekanai emiati, aneru, obia aubakia mai hiabu haukia ikoikiai nipoki
ainakia.

Eka Mauri Katehaeai.

4 **1** Keriso hauaniai ehaiara buonai, wai abomo raona weiana ihobonai
aomi katoba taburanakia, pokina hauani kehaiara hauna hanona
ki'a kehabonakia. **2** Ua buonai emi mauri ranikia ikoikiai aokiai hauani
ena nuatae ki'a obokia a'i katobabai, ia Tirama ena nuatae akakia
katobabainakia. **3** 'Uainai wai hanona rama haeai haukia ekia nuatae
ihobokiai tomiaho. Maha porepore, nuatae ki'a obokia akakia tobabai,
toinu 'ari, tobaripu ripu, tobapo'o po'o, kaiba'uku tokuti ainakia. **4** Bariu
maearima weiakia hanona teta'uta'u huri tehinabe ki'animi, pokina wai
ia kipokia a'i tubahamomo a'i tubaripu ripu paunai. **5** 'A ia hanona ekia
babai paukiai aba eba'oru mauri mai 'ari haukia kebakainakia Tiramana
wairanai katekoroti ekia pou katehina. **6** Weiana paunai pou namona 'ari
haukia herekiae eiroro aina, ia abokiamo hauanikia hanona bakai teal'ina
maearima ikoikiai 'abana, 'a aubakia hanona katemauri Tirama ena
nuatae ihobona.

Tirama Ena Aoko'o Hoakia I'ima Haraikia Haukai Kahaeao.

7 Taba ikoikiai ekia pua hanona aba nimai, ua buonai kipomi katoraona
harainimi aomi katoba kironakia ba katobahuba'ari. **8** 'A apa'uana tohana
hanona 'abami katoraona'au ainakia mai aomi ikoikiai, pokina raona'au
hanona ki'a bo'ona nibahu abunakia. **9** Emi ituai 'abami ha ha katoa'i
taeanakia ia a'i katoururu ainakia. **10** Tirama wai ha ha ena aoko'o hoanai
beruberu ebenimi, weianai ha ha katobarainimi Tirama ena aoko'o hoana
haeai haeai i'imana haumi namomiae katoao. **11** Hau ha keiroro raninai ia
hanona 'abi weiana Tirama herenai nimai hauna ihobonai keiroro aina,
haeamona hau ha nenuatae kebarai barai, weiana hanona Tirama tabura
ebena hauna ihobonai keakaina. Taba weiakia ikoikia aokiae Tirama

^b 3.21 'ao tiao

atana kahabanamona Iesu Keriso paunai. Nuabi mai hiabu ia 'euna keaomo banaibana. Amen.

Kahahaiara Keriso Ena Maearimai Nahaeao Paunai.

¹² E'u raona'au haumi e, baihobo haiarana 'eumi katerama hanona a'i katokai'au kai'au a'i katoraonana taba haeai ha 'eumiai erama. Aha'i.

¹³ A katoaonamo, pokina wai hanona Keriso ehau haiara 'abanai tuhau haiara, Keriso ena nuabiai kewaira tina aonai katoaonamo wairai. ¹⁴ Wai Keriso ena maearimai paunai tehinabe ki'animi raninai, banamona hanona wai 'eumi pokina Tirama ena Auba weiana nuabi Auba Robena hanona wai ahamiai. ¹⁵ A'i enamo wai ha kehau haiara ahuahu paunai 'ao bainao paunai 'ao aka ki'a paunai 'ao maearima haeai ekia aka aokiae nitoto paunai. ¹⁶ A wai ha kehau haiara Keriso ena maearima paunai, ia hanona a'i kehaumaea 'a Tirama kebanamona ata weiana ea'ina paunai.

¹⁷ Pokina ranina aba ekara'au Tirama ena maearima herekiae bakai kea'i ramana. Aika keba'uai ainaka raninai weiakia Tirama ena pou namona a'i tea'i taeana haukia herekiae hanona aea kepua aiho? ¹⁸ Puka robenai na terere aihona,

"Aka bero haukia bamauri
ia'inai katearo'ari raninai
Tirama a'i tia'l taeana haukia
mai ki'a haukia aea
katekori 'ini aiho?"

Aot 11.31

¹⁹ Ua buonai weiakia Tirama ena nuatae paunai tihau haiara haukia hanona aka namokia mo katababai, aubakia hanona ebabainakia Tiramana aia nibabua 'auna hauna imana aonai kateutanakia.

Tirama Ena Mamoe To'una Katoiha 'Ininakia.

5 ¹ Wai baiatamiae Tirama ena marea kiro haumi nabahi ahinimi, au abomo kiro hau'u, Keriso ehau haiara hanona au maha'uai aihana, nuabina kewaira tina aonai au mai e'u itau. ² Tirama ena mamoe to'una i'imakia haumiae katoao katoiha 'ini harainakia Tirama ena nuatae ihobonai. Baoao baoaoai a'i katobabaina, ia aomi mai nuatae tohanai katobabai. Moni paunai a'i katoaka ia aomi mai aonamonai katoiha 'inakia. ³ Wai katoiha 'inakia haukia herekiae ekia poki haumiae a'i katoao, ia herekiae ibabatai namokia haumiae katoao. ⁴ Weiana mamoe i'ima poki hauna Keriso kekara'au raninai wai hanona 'ara ibahuabuna^c nuabina a'i ke'akauma 'apua hauna katoa'ina.

⁵ Hau 'aru'arumi e, taeara ihobonai kiro haukia aiakia katona, ikoimiae kipomi 'aiaunu ai katobarainimi, pokina Puka robenai ererena etibaha,

^c 5.4 obia ibau'una

“Tirama hanona apa haukia
niwae'e ainakia,
'a 'aiaunu haukia hanona
keako'o ainakia.”

Aot 3.34

⁶Ua buonai kipomi katoba'aera 'aeranimi Tirama ena hiabu ba'anai kato'aiaunu, rani kemai aonai ia kehore wai keal'i taeanimi. ⁷Aomi ekia aro'ari ikoikiai Tirama herenai katohorotinakia, pokina ia hanona wai ne'imanimi.

⁸Katoraona harai kato'ima 'ima harainimi. Emi 'ou hauna tiaporo hanona wai heremai nikabanai kabawai neiki matoha mahi apa'uana atana laiona 'abana nibaitabu hau ha petonona hanona niraonana.

⁹Emi a'ikakaumai katokori 'ini tiaporo katokaibuna, pokina to'lobina uaho'abami maikoinai hanopaka neiana aonai hanona hau haiara ihibona mo tihoina. ¹⁰Aoko'o hoana ikoinai pokina Tiramana weiana Keriso aonai eaparinimi ena miao banaibana nuabina aonai kebaka totonimi hauna kehore wai rani papana mo katohau haiara, murinai ia kipona kebabero 'unumi, keba pahihinimi, kebataburanimi, keba kori 'ini harainimi. ¹¹Hiabu ikoikiai hanona Tirama 'euna keaomo banaibana. Amen.

Banamo 'Abina Orena.

¹²Sila ena baraibarai ai au marere papana neiana arere ko'ona. Au aihana ia hanona uaho'abaka tohana. Au arere benimi hanona aomi kabataburana mai kahina pouna Keriso paunai kahahau haiara hanona Tirama ena aoko'o hoana tohana. Wai aoko'o hoana neiana aonai katokori 'ini.

¹³Tirama ena marea maearimakia Babulono ai temiaho wai kipokia Tirama ea'i taeanimi haukia tehore ekia banamo 'abikia tebenimi, Mareko a'ikakaumai naha'u abomo ena banamo 'abina ebenimi.

¹⁴Raona'au hoana baipaunai ha ha emi banamo katobaiben.

Au nabahuba'ari Keriso aonai tomiaho haumi ikoimiai baibua aonai katomiaho.